

樂

府

傳

聲

序

樂之成其大端有七。一曰定律呂。二曰造歌詩。三曰正典禮。四曰辨八音。五曰分宮調。六曰正字音。七曰審口法。七者不備不能成樂。何謂定律呂。考黃鐘大呂之本。窮宮商徵羽之變是也。何謂歌詩。上極雅頌。下至謠諺。與凡詞曲有韻之文皆是也。何謂典禮。郊天祭地。宴饗贈答。房中軍中之所宜用是也。何謂八音。金石絲竹匏土革木。古今樂器是也。何謂宮調。旋宮之六十調。與今所存北曲之六宮十一調。南曲之九宮十三調是也。何謂字音。

一字有一字之正音。不可雜以土音。又北曲有北曲之音。南曲有南曲之音。是也。何謂口法。每唱一字。則必有出聲。轉聲。收聲。及承上接下諸法。是也。七者不盡通。不得名專精之士。然七者之學。非三人所能兼。則亦有可分習者。律呂歌詩典禮。此學士大夫之事也。其八音之器。各精一技。此樂工之事也。惟宮調字音口法。則唱曲者不可不知。然宮調大端難越。即有失傳。而一爲更換。即能循板歸腔。至字音亦一改。即能正其讀。惟口法。則字句各別。長唱有長唱之法。短唱有短唱之法。在此調爲

一法在彼調又爲一法。接此字一法。接彼字又一法。千變萬殊。此非若律呂歌詩典禮之可以書傳。八音之可以譜定。宮調之可以類分。字音之可以反切。別全在發聲吐字之際。理融神悟。口到音隨。顧昔人之聲已去。誰得而聞之。即一堂相對旋唱。而聲旋息。欲追其已往之聲而已。不復在耳矣。此口法之所以日變而日亡也。上古之口法。三代不傳。三代之口法。漢魏六朝不傳。漢魏六朝之口法。唐宋不傳。唐宋之口法。元明不傳。若今日之南北曲。皆元明之舊。而其口法亦屢變。南曲之變。變爲

崑腔去古浸遠自成一家其法盛行故腔調尚不甚失但其立法之初靡慢模糊聽者不能辨其爲何語此曲之最違古法者至北曲則自南曲甚行之後不甚講習即有唱者又即以南曲聲口唱之遂使宮調不分陰陽無別去上不清全失元人本意又數十年來學士太夫全不究心將來不知何所底止嗟夫樂之道久已喪失猶存一線於唱曲之中而又日即消亡余用憫焉爰作傳聲法若干篇借北曲以立論從其近也而南曲之口法亦不外是焉古人作樂皆以人聲爲本書曰詩言志歌

詩言聲依詠。律和聲。人聲不可辨。雖律呂何以和之。故人聲存而樂之本自不沒於天下。傳聲者所以傳人聲也。其事若微而可緩。然古之帝王聖哲所以象功昭德。陶情養性之本。實不外是。此學問之大端而盛世之所必講者也。乾隆甲子秋八月既望吳江徐大椿書於洄溪草堂。

曩侍安溪李文貞公每論聲氣之元与移
風易俗之本謂教化莫先於樂、以人聲為
重又論元曲只四齣猶有古者升歌笙入閒
歌合樂之遺意嘗欲編次史傳中忠孝廉節
諸事仿元人體製以授今崑腔去其淫聲豔
字而調理之亦可以感動人心有志未就略見
其說於古樂徑傳及榕村語錄中衰老健忘
亦十不記其一二矣辱承盛著自媿於聲音
之道未之有得獨欣然會心於人聲為本一
言覺先師緒論顯、在耳今樂由古樂庶幾

雅音其復振乎姑舉質言以識傾倒雅揚唐紹
祖題

細讀數過真發千古歇絕之秘籥而昭明疏
析之雖曹於音律如第之頑石亦輒點頭微
悟實天生神解之人於

盛朝審定律呂之時非但源流家學而已亟
宜刊行公諸寰宇無使變曠竒楓江之
上華亭黃之雋題

序

戊辰垂春吳江涂子霑胎山其所署樂府傳聲視
今且屬序爲序余北知音者爲眾以序涂子之書
雖然竊願有所質焉夫古樂之亡久矣然有不得
而止者存則聲足以故謂今樂非即古樂則可謂
今樂之聲非即古樂之聲則大不可何也樂有全
古之異聲無異也無異而古樂止請謁其故管賓
牟賈以致右憲左爲非武聖聲淫及商爲非正音
之有司失其傳也夫古聖王之樂制于四術弗教
成均習之庠序習之非僅掌之有司而已然猶不

免於失傳又況其法寄之作立子口者乎周之即
襄孔子曰樂石及漢初五經皆存而樂一經竟亡
制氏記鏗鏘鼓講之節樂之遺音也而時則病其
不能言義十略載周歌詩曲折若于篇樂之遺譜
也而時莫能歌若漢高帝喜楚聲且播之於安班
房中樂之而更好新聲度曲用李延年之屬昱皆
不以古樂爲事儒者若京房錙歌輩則惟詳求鍾
律不復致考遺聲宜古樂之終亡也魏時猶有杜
夔能歌鹿鳴文王伐檀駘翼四篇泊永嘉平不蕩
然無復遺矣雖然古樂之所亡者其曲折耳其節

奏耳聲則未有也漢魏之樂府唐不能歌而歌
詩唐之詩宋不能歌而歌詞宋之詞元不能歌而
歌西然歌曲之聲固即歌詞歌詩歌樂府之聲也
又獨非即歌南廼雅頌之聲與而安得云此與故
以樂而論則三百篇存樂府存詩經存而其曲
折節奏則盡亡以聲而論則歌南北曲聲節
進而歌詞歌詩歌樂府歌三百篇要亦無非此聲
故曰亡者其曲折耳其節奏耳聲則自在天壤間
也自元以來有北曲有南曲而善歌者首推三吳
南曲看于南耳故視北曲尤為盛行然明之中葉

以後于南曲刻意求五別爲清曲漸北元人之舊
又他傳奇之人喜集數西爲一以致宮調難分音
拍盡失訛且傳訛旨復引旨幾何而不盡變元人
之歌法哉徐子蓋有憫焉傳聲之所爲他也曰天
地之元聲未嘗一日息于天下一語已探聲律之
本而于宮調字音口法尤必三致意焉夫聲出于
口非審口法則開合發收混矣聲本于字非正字
音則陰陽平仄淆矣聲寄于調非別宮調則字句
雖符腔板全失而曲求可問矣此書不但爲時伶
下鍼砭爲元曲留面目并古今樂部之節奏西折

可由此而推見其萬一其功豈淺鮮哉徐子爲檢
討虹亭先生孫先生所著鞠莊詞見推名宿徐子
本其家學淵源而於音律夙具神解宜其言之明
且清也信今傳後復奚疑焉時

乾隆十三年二月既望同學德清胡彥穎拜手序

樂府傳聲目錄

源流

元曲家門

出聲口訣

聲各有形

五音

四呼

喉有中旁上下

鼻音閉口音

四聲各有陰陽

北字

平聲唱法

上聲唱法

去聲唱法

入聲派三聲法

入聲讀法

歸韻

收聲

交代

宮調

陰調陽調

字句不拘之調亦有一定格法

曲情

起調

斷腔

頓挫

輕重

徐疾

重音疊字

高腔輕過

低腔重煞

一字高低不一

出音必純

句韻必清

定板

底板唱法

道情序

附

目錄

樂府傳聲

吳江徐大椿靈胎著

源流

曲之變。上古不可考。自唐虞之賡歌擊壤以降。凡朝廷草野之間。其歌詩謠諺。不可勝窮。茲不盡述。若今日之聲存而可考者。南曲北曲二端而已。北曲之始。如金之董解元西廂記。元之馬致遠岳陽樓之類。南曲之傳。如元人高則誠琵琶記。施君美拜月亭之類。宮調既殊。排場亦異。然當時之唱法。非今日之唱法也。北曲如董之西廂記。僅可以入

弦索而不可以協簫管。其曲以頓挫節奏勝。詞疾而板促。至王實甫之西廂記。及元人諸雜劇。方可協之。簫管近世之所宗者是也。若北曲之西腔高腔梆子亂彈等腔。此乃其別派。不在北曲之列。南曲之異。則有海鹽義烏弋陽四平樂平等腔。至明之中葉。崑腔盛行。至今守之不失其偶唱北曲一二調。亦改爲崑腔之北曲。非當時之北曲矣。此乃風氣自然之變。不可勉強者也。如必字字句句皆求同於古人。一則莫可考究。二則難於傳授。況古人之聲已不可追。自吾作之。安知不有杜謨。

不合調之處。即使自成一家。亦仍非真古調也。故風氣之遞變。相仍無害。但不可依樣葫蘆。盡失聲音之本。并失後來改調者之意。則流蕩不知所窮矣。故可變者腔板也。不可變者口法與宮調也。苟口法宮調得其真。雖今樂猶古樂也。蓋天地之元聲未嘗一日息於天下。記云禮樂不可斯須去身。人生而有此形。卽有此聲。亦卽有此履中蹈和之具。但無人以發之。則汨沒而不能自振。後世之所以治不遵古者。樂先亡也。樂之亡。先王之教失也。我謂欲求樂之本者。先從人聲始。

元曲家門

元曲爲曲之三變自元以前歌已有南北之分其
法不傳而聲調大略亦可想見至元曲則分宮別
調獨成一家清濁陰陽以別其聲長短徐疾以定
其節宏細幽顯以分其調其體例如出一手其音
節如出一口雖文之高下各殊而音調無有不合
者歌法至此而大備亦至此而盡顯能審其節隨
口歌之無不合格調可播管絃者今人特不知深
思耳若其體則全與詩詞各別取直而不取曲取
理而不取文取顯而不取隱蓋此乃述古人之言

語使愚夫愚婦共見共聞非文人學士自吟自咏之作也若必鋪敘故事點染詞華何不竟作詩文而立此體耶譬之朝服遊山艷妝玩月不但不雅反傷俗矣但直必有至味俚必有實情顯必有深義隨聽者之智愚高下而各與其所能知斯爲至境又必觀其所演何事如演朝廷文墨之輩則詞語仍不妨稍近藻繪乃不失口氣若演街巷村野之事則鋪述竟作方言可也總之因人而施口吻極似正所謂本色之至也此元人作曲之家門也知此則元曲用筆之法曉然矣

出聲口訣

天下有有形之聲有無形之聲無形之聲風雷之類是也其聲不可爲而無定有形之聲絲竹金鼓之類是也其聲可爲而有定其形何等則其聲亦從而變矣欲改其聲先改其形形改而聲無弗改也惟人之聲亦然喉舌齒牙唇謂之五音開齊撮合謂之四呼欲正五音而不於喉舌齒牙唇處著力則其音必不真欲准四呼而不習開齊撮合之勢則其呼必不清所以欲辨真音先學口法口法真則其字無不真矣譬之簫管欲吹尺字必放尺

字之眼欲吹工字必放工字之眼若放工而欲吹
尺放尺而欲吹工雖神瞽不能也所謂其聲可爲
而有定者也今則口法皆不能知而欲其聲之眞
得乎又喉舌齒牙唇雖分五層然吐聲之法不僅
五也有喉底之喉有喉中之喉有近舌之喉餘四
音亦然更不僅此也卽喉底之喉亦有淺深輕重
其餘皆有淺深輕重千絲萬縷層層扣住方爲入
細其開齊撮合之中亦有半開全開半合全合之
不同其外又有鼻音半鼻抵腭抵齒等法其形亦
皆有定總之呼字十分眞則其形自從其形十分

真則其字自協。此自然之理。若不知其形而求其聲。則終身不能呼準一字也。

聲各有形

凡物有氣必有形。惟聲無形。然聲亦必有氣以出之。故聲亦有聲之形。其形惟何。大小闊狹長短尖鈍粗細圓扁斜正之類是也。古聖作字諧聲。皆由天籟。絕無一毫勉強。其義精微奇妙。不可思議。如大字之形大。小字之形小。闊字之形闊。狹字之形狹。餘數字無不皆然。惟口訣得傳。則字形宛肖。不得口訣。則大非大而小非小。出聲之際已偏。引長其音。遂不知何字矣。能將上數字鍊準口訣。則餘字盡可類推。如東鍾韻。東字之聲長。終字之聲短。

風字之聲扁。宮字之聲圓。蹤字之聲尖。翁字之聲鈍。江陽韻。江字之聲闊。臧字之聲狹。堂字之聲粗。將字之聲細。潛心分別其形。顯然其口。訣大端。雖不外開齊撮合。喉舌齒牙唇而細分之。則無盡。有張口者。有半張者。有閉口者。有半閉者。有先張後閉者。有先閉後張者。有喉出唇收者。有喉出舌收者。有全喉全舌者。有半喉半舌者。以上諸條。互相出入。不可勝計。其外又有落腮穿齒穿牙。覆唇挺舌。透鼻過鼻種種諸法。不可枚舉。總在將此字識真。念準。審其字聲從口中何處著力。則知此字必

如何念法方確。卽知其形於長短闊狹之內居何等矣。然後人之聽之無不知其爲何字。雖絲竹雜和不能奪而亂之矣。此千古未發之微義也。

五音

喉舌齒牙唇謂之五音。此審字之法也。聲出於喉爲喉。出於舌爲舌。出於齒爲齒。出於牙爲牙。出於唇爲唇。其詳見等韻切韻等書。最深爲喉音。稍出爲舌音。再出在兩旁壯齒間爲齒音。再出在前壯齒間爲牙音。再出在唇上爲唇音。雖分五層其實萬殊。喉音之淺深不一。舌音之淺深亦不一。餘三音皆然。故五音之正聲皆易辨。而交界之間甚難辨。然其界限又復井然。一日之中並無疆畔而絲毫不可亂。此人之所以爲至靈造物之所以爲至。

奇也。能知其分寸之所在。一線不移。然後其音始
的。而出聲之際。不致眩惑。遊移。再參之以開齊撮
合之法。自然辨晰秋毫矣。餘詳口訣篇內。

四呼

開齊撮合。謂之四呼。此讀字之口法也。開口謂之開。其用力在喉。齊齒謂之齊。其用力在齒。撮口謂之撮。其用力在唇。合口謂之合。其用力在滿口。欲讀此字。必得此字之讀法。則其字音始真。否則終不能合度。然此非喉舌齒牙唇之謂也。蓋喉舌齒牙唇者。字之所從生。開齊撮合者。字之所從出。喉舌齒牙唇各有開齊撮合。故五音爲經。四呼爲緯。今人雖能知音之正。而呼之不清者。皆開齊撮合之法不習故也。餘見口訣篇內。

喉有中旁上下

喉舌齒牙唇爲五音者。從內至外言之也。其位實有五層。其音雖皆本於喉。而用力之地。則層層各別。此人人所知者也。至五音中。又各有五音。則前人之所未道者。天下之理。有縱必有橫。喉舌齒牙唇。縱也。喉音中之五音。橫也。何謂五。高而清之字。則從喉之上。面用力低而濁之字。則從喉之下。面用力。歛而扁之字。則從喉之兩旁。用力正而圓之字。則從喉之中間。用力故出聲之時。欲其字清而高。則將氣提而向喉之上。欲濁而低。則將氣按而

著喉之下。欲歛而扁。則將氣從兩旁逼出。欲正而圓。則將氣從正中透出。自然各得其真。不煩用力。而自響且亮矣。此非特喉音之字如此。凡舌齒牙唇之字。呼法皆然。但舌齒牙唇。雖著力之地。各殊。而總不能離乎喉也。故喉舌齒牙唇。爲經。上下兩旁正中。爲緯。經緯相生。五五二十。有五而出聲之道。備矣。此千古之所習而不察者也。

鼻音閉口音

喉舌齒牙唇之外。又有鼻音閉口音者。何也。蓋聲音之道。所以暢發天地之和氣。雖以清明陳亮爲主。但皆清明陳亮一往不返。則律呂之氣有張無翕。不能備四氣之和。此鼻音閉口音。所以不能無也。如庚青三韻。乃正鼻音也。東鐘江陽乃半鼻音也。尋侵監咸廉纖。則閉口音也。正鼻音則全入鼻中。半鼻音則半入鼻中。卽閉口之漸也。閉口之音。自侵尋至廉纖而盡矣。故中原音韻以東鐘起。以廉纖終。終之以閉口者。猶四時之令窮於冬也。東

鐘則春令之始也。但立春之時。陽氣初動。故猶稍帶鼻音。有出而未舒之象。自庚青正鼻音之後。卽從尤候之合口喉音。轉入尋侵閉口。亦以漸而收藏。此天地自然之理。編韻之人。雖未必有意爲之。而天地元音之終始。其序自然。而不可紊也。故能知鼻音閉口音法。則曲中之開合呼翕。皆與造化相通。然後清而不噍。放而不濫。有深厚和粹之妙。故鼻音閉口音之法。不可不深講也。

四聲各有陰陽

字之分陰陽從古知之。宋人填詞極重。只散見於諸家論說而無全書。作中原音韻將每韻分出最爲詳盡。但只平聲有陰陽而餘三聲皆不分陰陽。不知以三聲本無分乎抑難分乎抑可以不分乎。或又以爲去入有陰陽而上聲獨無陰陽此更悖理之極者。蓋四聲之陰陽皆從平聲起。平聲一出則四呼皆來。一貫到底不容勉強亦不可移易。豈有平聲有陰陽而三聲無陰陽者。亦豈有平去入有陰陽而上聲獨無陰陽者。此等皆極荒唐之說。

後人竟不深求不得不急爲拈出使天下後世作曲與唱曲之人確然有所執持而審音不惑如宗字爲陰宗總縱足皆陰也戎字爲陽戎冗誦族皆陽也上仄字豈可刪去一字亦豈可互易一字亦豈可宗戎有陰陽而下六字無陰陽更豈可縱足與誦族有陰陽而總與冗無陰陽此有耳者之所共察不必明於虞曲者而後知之也余常欲以中原音韻四聲之陰陽每字皆爲分定以息千古紛紛之說尙未遑而有待但作曲者能別平聲之陰陽已屬難事若併三聲而分之則尤艱於措筆不

必字字苛求。然不可以作曲之難。而併字之陰陽。亦泯之也。

北聲

凡唱北曲者。其字皆從北聲。方爲合度。若唱南音。卽爲別字矣。然北字之異乎南者。十居四五。若必字字從北。則南方之人。竟有全不解者。此亦不必盡泥也。蓋當時之北曲。以北人造之。北人習之。彼自唱彼之音。自然皆從北讀。若南人唱之。南人聽之。則卽唱南人之音。似亦無害於理。但以北字改作南音。則聲必不和。何則。當時原以北字配調。故也。況南人以主音雜之。只可施之一方。不能通之天下。同此一曲。而一鄉有一鄉之唱法。其弊不勝

窮矣。愚有說焉。凡北曲之字。有天下盡通之正音。唱又不失此調之音節者。不必盡從北字也。如崇字。本音戎。而北讀爲虫。重字。本音虫。去聲。北讀爲虫。去聲。事字。本時至切。北讀爲世。杜本音渡。北讀爲妬之類。如此者。不一而足。若必盡從北音。則唱者與聽者。俱不相洽。反爲無味。譬之南北兩人相遇。談心各操土音。則兩不相通。必各遵相通之正音。方能理會。此人情之常。何不可通於度曲耶。但不可。以土音改北音耳。至於北字中。人人能曉。或此宮此調。必如此方合者。則必不可以南曲之字。

易之也

平聲唱法

四聲之中。平聲最長。入聲最短。何以驗之。凡三聲拖長之後。皆似平聲。入聲則一頓之外。全無入象。故長者。平聲之本象也。但上去皆可唱長。卽入聲派入三聲。亦可唱長。則平聲之長。何以別於三聲。耶。蓋平聲之音。自緩。自舒。自周。自正。自和。自靜。若上聲必有挑起之象。去聲必有轉送之象。入聲之派入三聲。則各隨所派。成音。故唱平聲。其訣尤重在出聲之際。得舒緩周正和靜之法。自與上去迥別。乃爲平聲之正音。則聽者。不論高低輕重。一吟

而知其爲平聲之字矣

上聲唱法

上聲亦只在出字之時分別。方開口時須畧似平聲。字頭半吐卽向上一挑。方是上聲正位。蓋上聲本從平聲來。故上聲之字頭必從平聲起。若竟從上起。則其聲一響已竭。不能引而長之。若聲竭而復拖下。則反似平聲字矣。故唱上聲極難。一吐卽挑挑後不復落下。雖其聲長唱微近平聲。而口氣總皆向上不落平腔。乃爲上聲之正法。雖數轉而聽者仍知爲上聲。斯得唱上聲之法矣。

去聲唱法

今北曲之最失傳者其唱去聲盡若平聲蓋北曲本無入聲若併去聲而無之則只有兩聲矣夫兩聲豈能成調耶況北曲之所以別於南者全在去聲南之唱法以揭高爲主北之唱去不必盡高惟還其字面十分透足而已笛中出一凡字合曲者惟云聲爲多如唱凍字則曰凍紅翁唱問字則曰問恹恩唱秀字則曰秀喉嚨長腔則如此三腔短腔則去第三腔再短則念完本字卽收總不可先帶平腔蓋去聲本從上聲轉來一著平腔便不能

復振。始終如平聲矣。非若上聲之本從平聲轉出。可以先似平聲。轉到上聲也。譬如四時。從春轉夏。則可。從春轉秋。則不可。此自然之理也。況去聲最有力。北音尙勁。去聲真確。則曲聲亦勁而有力。此最大關係也。今之所以唱去聲似平聲者。何也。自南曲盛行。曲尙柔靡。聲口已慣。不能轉勁。又去聲唱法。頗須用力。不若平讀之。可以隨口念過。一則循習使然。一則偷氣就易。又久無審音者。爲之整頓。遂使去聲盡亡。北音絕響。最可慨也。

入聲派三聲法

北曲無入聲。將入聲派入三聲。蓋以北人言語本無入聲。故唱曲亦無入聲也。然必分派入三聲者何也。北曲之妙。全在於此。蓋入聲本不可唱。唱而引長其聲。卽是平聲。南曲唱入聲。無長腔。出字卽止。其間有引長其聲者。皆平聲也。何也。南曲唱法。以和順爲主。出聲拖腔之後。皆近平聲。不必四聲鑿鑿。故可稍爲假借。惟北曲則平自平。上自上去。自去字字清真。出聲過聲。收聲分毫不可寬假。故唱入聲亦必審其字勢。該近何聲。及可讀何聲。派

定唱法。出聲之際。歷歷分明。亦如三聲之本音。不可移易。然後唱者有所執持。聽者分明辨別。非若南曲之皆似平聲。無相徑庭也。故觀派入三聲之法。則北曲之出字清。真益可徵據。此探微之論也。至派入三聲異同之法。又別有論。

入聲讀法

北曲皆遵中州音韻。其平上去三聲皆與唐韻及洪武正韻等相同。其有異者。百中之一耳。其五音四呼亦不相遠。若入聲之字。皆派入三聲。竟有大相徑庭。全非其字者。何也。蓋三聲多連合一貫。獨至入聲而別。有有三聲而無入聲之字。亦有有入聲而無三聲之字。今北曲無入聲之唱。盡將入聲唱作三聲。而三聲中無此字。則不得不另作一聲矣。如曲字。本邱六切。若本音之平聲。則邱都切。是有聲無字矣。故變而作區樂字。本盧各切。若本音

之平聲則盧沙切。亦有聲無字矣。故變而作勞。其餘如削之爲宵。鶴之爲浩。不一而足。自六經子史皆同。不獨中州音韻爲然也。惟古韻從無此讀法。而五音四呼又不通者。此乃當時之士音則不妨。或從古音。或從今音。不必悉遵其讀也。又其派入三聲有一定之法。與古音亦稍殊。如鹿字。中州韻作去聲。音露。古音露亦音盧。出字。中州韻作上聲。音杵。古音作平聲。則赤知切。作去聲。則赤至切。三聲多有通融之處。蓋入之讀作三聲者。緣古人有韻之文。皆以長言咏嘆出之。其聲一長。則入聲之

字自然歸入三聲此聲音之理非人所能強也故
古人有此讀法者三聲原可通用不必盡從中州
韻如從無此音者則不可自我亂之恐人之難辨
也試從古音一一考之則入聲派入三聲之故可
明而二代已前之歌法亦可推測而知矣

歸韻

唱曲能令人字字可辨。不但平上去入四聲準。開齊撮合四呼清而已。四聲四呼止能於出聲之時。分別字頭。使人明曉。至出字之後。引長其聲。卽屬公共之響。况有絲竹一和。尤易混入。譬如簫管之音。雖極天下之良工。吹得音調明亮者。祇能分別工尺。令聽者一聆而知其爲何調。斷不能吹出字面。使聽者知其何字也。蓋簫管止有工尺無字面。此人聲之所以可貴也。四聲四呼清則出口之字面已正。而不知歸韻之法。則引長之字面仍與簫

管同故尤以歸韻爲第一。歸韻之法如何。如東鐘字。則使其聲出喉中。氣從上腭鼻竅中過。令其聲半入鼻中。半出口外。則東鐘歸韻矣。江陽則聲從兩頤中出。舌根用力。漸開其口。使其聲朗朗如叩金器。則江陽歸韻矣。支思則聲從齒縫中出。而收細其喉。徐放其氣。切勿令上下齒牙相遠。則支思歸韻矣。能歸韻。則雖十轉百轉。而本音始終一線。聽者卽從出字之後。驟聆其音。亦鑿鑿然知爲某字也。况字真。則義理切實。所談何事。所說何人。悲歡喜怒。神情畢出。若字不清。則音調雖和。而動人

不易。譬如禽獸之悲鳴喜舞。雖情有可相通。終與人類不能親切相感也。但人之喉嚨靈頑不一。靈者則各韻自能分出各韻之音。頑者一味響亮。不能鑿鑿分別。卽字面不差。而一放則不甚相遠。又有幾韻能分。幾韻不能分。各因其聲之所近。以爲優劣。若十九韻俱能分者。絕少。此又得之天分。非人力所能強也。

收聲

天下知出聲之法爲最重。而不知收聲之法爲尤重。蓋出一字而四呼四聲五音無誤。則其字已的確可辨。猶人所易知而易能也。惟收聲之法。則不但當審之極清。尤必守之有力。自出聲之後。其口法一定。則過腔轉腔音雖數折。而口之形與聲所從出之氣。俱不可分毫移動。蓋聲雖同出於喉。而所著力之處。在口中各有地位。字字不同。如開口之喉音。其聲始終從喉著力。其口始終開而不閤。閉口之舌音。其聲始終從舌著力。其口始終閉而

不開其餘字字皆然。斯已難矣。至收足之時尤難。蓋方聲之放時。氣足而聲縱。尙可把定。至收末之時。則本字之氣將盡。而他字之音將發。勢必再換。口訣畧一放鬆而呻吟。嗚叱之聲隨之。不知收入何宮矣。故收聲之時。尤必加意扣住。如寫字之法。每筆必有結束。越到結束之處。越有精神。越有頓挫。則不但本字清真。卽下字之頭亦得另起峯巒。益覺分明透露。此古法之所極重。而唱家之所易忽。不得不力爲剖明者也。然亦有二等焉。一則當重頓。一則當輕勒。重頓者。煞字煞句。到此斬然劃

斷此易曉也。輕勒者過文連句。到此委宛脫卸。此難曉也。蓋重者其聲濁而方。輕者其聲清而圓。其界限之分明則一。能知此則收聲之法思過半矣。

交代

凡曲以清朗爲主。欲令人人知所唱之爲何曲。必須字字響亮。然有聲極響亮。而人仍不能知爲何語者。何也。此交代不明也。何爲交代。一字之音。必有首。腹。尾。必首腹尾音已盡。然後再出一字。則字字清楚。若一字之音未盡。或已盡而未收足。或收足而於交界之處。未能劃斷。或劃斷而下字之頭。未能矯然。皆爲交代不清。况聲音愈響。則聲盡而音未盡。猶之叩石之鐘。一叩之後。卽鳴他器。則鐘聲方震。他器必若無聲。故聲愈響。則音愈長。必

尾音盡而後起下字而下字之頭尤須用力方能
字字清澈否則反不如聲低者之出口清楚也凡
響亮之喉宜自省焉不得恃聲高字真必謂人人
能曉也

宮譜

古人分立宮調各有鑿鑿不可移易之處其淵源
不可得而尋而其大旨猶可按詞而求之者如黃
鐘調唱得富貴纏綿南呂調唱得感嘆悲傷之類
其聲之變雖係人之唱法不同實由此調之平仄
陰陽配合成格適成其富貴纏綿感嘆悲傷而詞
語事實又與之合則宮調與唱法須得矣故古人
填詞遇富貴纏綿之事則用黃鐘宮遇感嘆悲傷
之事則用南呂宮此一定之法也後世填詞家不
明此理將富貴纏綿之事亦用南呂調遇感嘆悲

傷之事亦用黃鐘調使唱者從調則與事違從事則與調違此作詞者之過也若詞調相合而唱者不能尋宮別調則咎在唱者矣近來傳奇合法者雖少而不甚相反者甚多仍宜依本調如何音節唱出神理方不失古人配合宮調之本否則盡忘其所以然而宮調爲虛名矣

陰調陽調

古人唱法所謂陰陽者乃字之陰陽非人聲之陰陽也。字之陰陽者如東爲陰同爲陽二字自有清濁輕重之別。至人聲之陰陽則逼緊其喉而作雌聲者謂之陰調。放開其喉而作雄聲者謂之陽調。遇高字則唱陰。遇低字則唱陽。此大謬也。夫堂堂男子唱正大雄豪之曲而逼緊其喉不但與其人。不相稱。卽字面斷不能真。蓋喉間逼緊則字面皆從喉中出而舌齒牙唇俱不能著力。開齊撮合亦大半不能收。准卽使出聲之後作意分清終不若

卽從齒舌牙唇者之親切分明也。惟優人之作旦者，欲効女聲，則不得不逼緊其喉。此則純用陰調者然。卽陰調之中，亦有陰陽之別，非一味逼緊也。若陽調中之陰陽放開直出者，爲陽之陽，將喉收細，揭高。世之所謂小堂調者，爲陽之陰。此則一起一倒，無曲不有，而逼緊之陰不與焉。今之逼緊喉嚨者，乃欲唱高調而不能，故用力火，乍吊起不覺犯逼緊之病。一則喉木不佳，一則不善用喉之故也。然逼緊之字，亦間有之。高調之曲，連轉幾字，幾腔，層層泛起，愈轉愈高，則音必愈細。陽聲已竭，喉

底之真氣出而接之自然聲出至深與逼緊相似
此乃自然而然非有意爲之若世俗之所謂陰調
也至近日之所謂時曲清曲者則字字逼緊俱從
喉中一絲吐出依然講五音四呼之法實則五音
四呼何處著力以至聽者一字不能分辨此曲之
下賤風流掃地矣

字句不拘之調亦有一定格法

北曲中有不拘句字多少。可以增損之格。如黃鐘之黃鐘尾。仙呂之混江龍。南呂之草池春之類。世之作此調者。遂隨筆寫去。絕無格式。真乃笑談。要知果可隨意長短。何以仍謂之黃鐘尾。而不名之爲混江龍。又不謂之草池春。且何以黃鐘尾不可入仙呂。混江龍不可入南呂。即此真不思之甚。而訂譜者。亦僅以不拘字概之。全無格式。令後人易誤也。蓋不拘字句者。謂此一調字句不妨多寡。原謂在此一調中。增減並不謂可增減在他調也。然



則一調自有一調章法句法及音節森然不可移
易。不過謂同此句法而此句不妨多增同此音節
而此音不妨疊唱耳。然亦只中間發揮之處。因上
文文勢趨下才高思湧一瀉難收。依調循聲鋪敘
滿意既不踰格亦不失調。至若起調之一二句及
收調之一二句則陰陽平仄一字不可移易增減
如此則聽者方能確然審其爲何調否則竟爲無
調之曲荒謬極矣。細考舊曲自能悟之不能悉錄
也。

斷腔

南曲之唱。以連爲主。北曲之唱。以斷爲主。不特句斷字斷。卽一字之中。亦有斷腔。且一腔之中。又有幾斷者。惟能斷。則神情方顯。此北曲第一喫緊之處也。而其法則非一端。有另起之斷。有連上之斷。有一輕一重之斷。有一收一放之斷。有一陰一陽之斷。有一口氣而忽然一斷。有一連幾斷。有斷而換聲吐字。有斷而寂然頓住。以上諸法。南曲亦間有之。然不若北曲之多。禮記所云。曲如折。止如槁。木。正此之謂也。近時南曲盛行。不但字法皆南。卽

有斷法亦是南曲之斷與北曲迴別蓋南曲之斷乃連中之斷不以斷爲重北曲未嘗不連乃斷中之連愈斷則愈連二應神情皆在斷中頓出故知斷法之精微則北曲之神理思過半矣然斷與頓挫不同頓挫者曲中之起倒節奏斷者聲音之轉折機關也

頓挫

唱曲之妙。全在頓挫。必一唱而形神畢出。隔垣聽之。其人之裝束形容。顏色氣象。及舉止瞻顧。宛然如見。方是曲之盡境。此其訣全在頓挫。頓挫得款。則其中之神理自出。如喜悅之處。一頓挫而和樂出。傷感之處。一頓挫而悲恨出。風月之場。一頓挫而豔情出。威武之人。一頓挫而英氣出。此曲情之所最重也。况一人之聲連唱數字。雖氣足者亦不能接續。頓挫之時。正唱者因以歇氣。取氣亦於唱曲之聲大有補益。今人不通文理。不知此曲該於

何處頓挫。又一調相傳。守而不變。少加頓挫。卽不能合。著板眼。所以一味直呼。全無節奏。不特曲情盡失。且令唱者氣竭。此文理所以不可無也。要知曲文斷落之處。文理必當如此者。板眼不妨畧爲伸縮。是又在明於宮調者爲之增損也。

輕重

聲之高低與輕重全然不同。今則候以輕重爲高低。所以唱高字則用力叫呼。唱低字則隨口帶過。此大謬也。高低之法詳於高腔。輕過篇。今先明輕重之法。輕者鬆放其喉。聲在喉之上。一面吐字清圓。飄逸之謂。重者按捺其喉。聲在喉之下。一面吐字平實沈著之謂。凡從容喜悅及俊雅之人。語宜用輕。急迫惱怒及粗猛之人。語宜用重。又有一句之中某字當輕。某字當重。亦有一調之中某句當輕。某句當重。總不一定。但輕重又非響不響之謂。

也有輕而不響者。有輕而反響者。有重而響者。有重而反不響者。蓋高低者調也。輕重者氣也。響不響者聲也。似同而實異。細別之自顯然。但不明言之。則習而不察耳。

徐疾

曲之徐疾亦有一定之節。始唱少緩。後唱少促。此章法之徐疾也。閒事宜緩。急事宜促。此時勢之徐疾也。摹情玩景宜緩。辨駁趨走宜促。此情理之徐疾也。然徐必有節。神氣一貫。疾亦有度。字句分明。倘徐而散漫無收。疾而糊塗一片。皆大繆也。然太徐之害猶小。太疾之害尤大。今之疾唱者。竟隨口亂道。較之常人言語更快。不特字句不明。并唱字之義全失之矣。惟演劇之場。或有重字疊句。形容一時急迫之象。及收曲幾句。其疾宜更甚於尋常。

言語者然亦必字字分明。皎皎落落無一字輕過。內中遇緊要眼目。又必跌宕而出之。聽者聆之。字句甚短。而音節反覺甚長。方爲合度。舍此則寧徐無疾也。曲品之高下大半在徐疾之分。唱者須自審之。

重音疊字

重音者二字之音相近如逢蒙希夷之類聽者易疑爲兩字相同是也疊字者如飄飄隱隱之類聽者易疑爲一字兩腔是也此等最宜留意凡唱重音之字則必將字頭作意分別如陰陽輕重四呼五音必有不同之處剔清字面則聽者鑿鑿知爲兩音矣唱疊字之音則必界限分明念完上字之音鈎清頓住然後另起字頭又必與前字畧分異同或一輕一重一高一低一徐一疾之類譬之作書之法一帖之中其字數見無相同者則聽者鑿

鑒知爲兩字矣此等雖係曲中之末節而口訣之妙反於此見長若工夫不到至此音無把握也

高腔輕過

腔之高低不係聲之響不響也。蓋所謂高者音高。非聲高也。音與聲大不同。用力呼字使人遠聞。謂之聲高。揚起字聲。使之向上。謂之音高。卽如同是一曲。唱上字尺字調。則聲雖用力而音總低。唱正調乙字調。則聲雖不用力而音總高。此在喉中之氣。向上向下之別耳。凡高音之響必狹。必細。必銳。必深。低音之響必闊。必粗。必鈍。必淺。如此字要高。唱不必用力。儘呼。惟將此字做狹。做細。做銳。做深。則音自高矣。今人不曾此意。凡遇高腔。往往將細

狹深銳之法變成陰調。此又似是而非也。蓋陽調有陽調之高低。陰調有陰調之高低。若改陽爲陰。謂之高。則陰之當高者。又何改耶。且調有斷不可陰者。若改陽爲陰。又失本調之體矣。能知唱高音之法。則下等之喉。亦可進於中等。中等可進於上等。凡遇當高揭之字。照上法將氣提起。透出吹者。按譜順從。則聽者已清皙明亮。唱者又全不費力。蓋字之高下一定。而人之聲音各別。能知此。則人人可唱高音之曲。各如其人之分量。而無脫調之慮。否則唱高調之曲。必極響之喉。方可而喉之稍

次者只宜唱低調之曲是調以人分而一人之聲
只可限以一調畧高卽屬勉強矣此不知高腔輕
過之法也

低腔重煞

低腔與輕腔不同。輕腔者將字音微逗其聲必清細而柔媚。與重字反對。若低腔則與高字反對。聲雖不必響亮而字面更須沈著。凡情深氣盛之曲。低腔反最多。能寫沈鬱不舒之情。故低腔宜重。宜緩。宜沈。宜頓。與輕腔絕不相同。今之唱低腔者。反以爲偷力之地。隨口念過。遂使神情渙漫。語氣不續。不知曲之神理全在低腔也。

一字高低不一

字之配入工尺高低本無一定。如世所傳儀禮通傳樂譜鹿鳴之我有嘉賓。首章則我爲蕤。有爲林。嘉爲應賓。爲南。次章則我爲林。有爲南。嘉爲應賓。爲黃。諸律旋用。則高低互易。從古如此。所以天下有不入調之曲。而無不可唱之曲。曲之不入調者。字句不准。陰陽不分。平仄失調是也。無不可唱者。遷低就高。遷高就低。平聲仄讀。仄聲平讀。凡不合調。不成調之曲。皆可被之管絃矣。然必字字讀真。而能不失宮調。諧和絲竹。方爲合度之曲耳。故曲

之王不工。唱者居其半而作曲者居其半也。曲盡合調而唱者違之。其咎在唱者。曲不合調則使唱者依調則非其字。依字則非其調。勢必改讀字音。遷就其聲以合調。則調雖是而字面不真。曲之不能作曲者不能辭其責也。故字聲之高下可以通融者。如鹿鳴所譜之類。原可以出入轉移。其不可通融之處。則斷不得用此一字而離宮失調。亦不得因欲合調而出韻乖聲。故作曲者與唱曲者不可不相謀也。

出音必純

凡出字之後。必始終一音。則腔雖數轉。聽者仍知爲卽此一字。不但五音四呼不可互易。并不可忽陰忽陽。忽重忽輕。忽清忽濁。忽高忽低。方爲純粹。凡犯此病者。或因沙澁之喉。不能一線到底。或因隨口轉換。漫不經心。以致一字之頭腹尾。往往互異。不但聽者不清。卽絲竹亦難合和。故必平日先將喉嚨洗剔清明。使聲出一線。則隨其字之清濁高下。俱不至一字數聲矣。

句韻必清

牌調之別全在字句及限韻。某調當幾句。某句當幾字及當韻不當韻。調之分別全在乎此。唱者遵此不失自然。事理明曉。神情畢出。宮調井然。今乃只顧腔板。句韻蕩然。當連不連。當斷不斷。遇何調則依工尺之高低。唱完而止。則古之鑿鑿分別幾句幾字幾韻。全然可以不必也。蓋言語不斷。雖室人不解其情。文章無句。雖通人不曉其義。況於唱曲耶。如琵琶辭。朝折啄木兒。事親事君一般。道人生怎全忠和孝。却不道母死王陵歸漢朝。近時唱

者道字拖腔連下人字孝字急疾并接却字是句韻皆失矣。如此者十之四五。試令今之登場者依崑腔之唱法聽者能辨其幾句幾韻百不能得一句也。句韻之法不幾盡喪耶。惟北曲尚有句可尋有韻可辨然亦不能收清收足此亦漸染於崑腔所致。崑腔作法之始原不至如此之極而流弊不可不亟拯也。餘見頓挫斷腔諸篇。

定板

板之設。所以節字句。排腔調。齊人聲也。南曲之板。分毫不可假借。惟北曲之板。竟有不相同者。蓋南曲惟引子無板。餘皆有板。北曲則祇有底板。無實板之曲。極多。又南曲之字句。無一調無定格。而北曲則不拘字句之調。極多。又南曲襯字甚少。少則一字。幾腔板在何字何腔。千首一律。若北曲則襯字極多。板必有不能承接之處。中間不能不增出一板。此南之所以有定。北之所以無定也。且元人之曲。不但以虛字爲襯。且有以實字爲襯者。如本

調當用天地人三實字爲句。若祇視一二虛字在三字上。仍是三字句。乃竟用春夏秋冬四實字爲句。則將以何字作視字耶。則不但視多難簇。且正調不分。此板之所以尤無定也。然無定之中。又有一定者。蓋板殊則腔殊。腔殊則調殊。板一失。則宮調將不可考矣。故惟過文轉接之間。板可畧爲增損。所以便歌也。至緊要之處。板不可少有移易。所以存調也。此北曲之板。雖寬而實未嘗不嚴也。

底板唱法

南曲惟引子用底板。餘皆有定板。北曲則底板甚多。何也。蓋南曲之板。以節字。不以節句。北曲之板。以節句。不以節字。節字則板必繁。節句則一句一板足矣。惟著議論描寫。及轉折頓挫之曲。亦用實板。節字。然亦不若南曲之密。凡唱底板之曲。必音節悠長。聲調宏放。氣緩辭舒。方稱合度。又必於轉接出落之間。自生頓挫。無節之中。處處皆節。無板之處。勝於有板。如鶴鳴九皋。干雲直上。又如天際風。等宮商自協。方爲能品。此可意會。非可言罄也。

道情序 附

道情之唱由來最古。其聲則飛馭天表。游覽太虛。俯視八紘。志在沖漠之上。寄傲宇宙之間。慨古感今。有樂道徜徉之情。故曰道情。其說相傳如此。乃曲體之至高至妙者也。迄今久失其傳。僅存時俗所唱之耍孩兒。清江引數曲。卑靡庸濁。全無超世出塵之響。其聲竟不可尋矣。癸亥之春。余作樂府傳聲將竣。凡諸音調。俱探本窮流。辨悉微奧。猶慨古人聲音之道。失傳者尚多。而道情之絕。爲尤可惜。尋其聲而不可得。卽今所存耍孩兒諸曲。究其

端倪推其本初沿其流派似北曲仙呂入雙調之
遺響乃推廣其音令開合弛張顯微曲折無所不
暢聲境一開愈轉而愈不窮實有移情易性之妙
但徒以工尺四上爲之譜則有聲無辭可飭知音
難以動衆且不便於傳遠因拈雜題數十首半爲
警世之談半寫閒遊之樂總不離於見道者之語
以聲布詞以詞發聲悉一心之神理遙接古人已
墜之緒若古人果如此則此音自我續之若古人
不如此則此音自我創之無論其續與創要之律
呂頤宮商協絲竹和可以適志可以動人卽成尚

詞之一家後世有考音者出亦不得舍此不問而別求所謂道情矣